

四庫全書

集部

欽定四庫全書

集部

後村集卷二

詳校官庶吉士臣吳烜

主事臣呂雲棟覆勘

總校官進士臣朱鈐

校對官主事臣陳文樞

謄錄監生臣鄒世俊

欽定四庫全書

集部四

後村集

別集類三 宋

提要

臣等謹案後村集五十卷宋劉克莊撰克莊字潛夫莆田人以蔭入仕官終龍圖閣直學士謚文定克莊受業於真德秀而晚節不終頗為當時所譏詩派近楊萬里大抵詞病質俚而意傷淺露故方回作瀛奎律髓極不滿

之然其清新獨到之處要亦有未可盡廢者  
律髓載其十老詩最為俗格今南岳第二稿  
惟存三首而刪其七則此集亦嘗經訂定矣  
文章古潔較勝其詩坊本所刻詩十六卷詩  
話詩餘各二卷毛晉津逮秘書又刻其題跋  
二卷而文集三十卷並闕焉此為抄傳足本  
第四十三四兩卷載玉牒初草紀寧宗  
嘉定十一十二年事蓋用韓愈集編順宗實

錄例也乾隆四十六年五月恭校上

總纂官臣紀昀臣陸錫熊臣孫士毅

總校官臣陸費墀



後村居士集原序

作者不祈人之知知之者常在數十年之後自古諸  
名人皆然蓋未有其人之好惡未齊而其文之聲價  
已定者摘其小疵而指為大謬悠悠穹壤異喙同詞  
昔之人固有憤恨於時而棄擲其平生所作者或瘞  
以塚或泛以瓢豈非痛識真之難耶獨我祖宗盛時  
儒學明而士具眼文章家之品目未嘗以窮達為高  
下若歐曾蘇之名以文梅黃陳之名以詩雖其身困

蹟寂寥諳者詈者附和同聲而片文隻字人人賞重其傳則自若也中興百年以文字行於今者其最大亦十數家大半手自編次一時或遇或否互為升沉於文何加損焉此我朝人物議論之公有非前代所可及者後村先生劉公得文名最蚤排觝於時亦最甚僕纔少公七歲而疇昔受學樂軒時已嘗誦公南嶽稿蓋吾師一日得之喜甚呼而語僕曰子於時喜義山禹錫二氏是編猶有劉李所未到者余受而味之



曰此世所稱二劉諸孫者耶此章泉澗泉諸老之所畏者耶此水心所謂可建大將旗鼓者耶兩鄉相望雖未能數舍而其人則未之識也既而僕走江淮後村以讒廢十年矣身雖詘而文日傳時從數千里外有能道其名而誦其詩語以為今人率不信亦知公之詩名久而傳者遠矣端平初余留太學偶謁計幕湯公巾後村時以西府掾對晦靜語余曰子得潛夫對疏乎言所難言非特詞章為妙西山之門此為巨擘余

于是知公于詩之外尤有過人者然猶未及登門也余成進士南歸後村旋亦去國始克見於其居挾策過從凡一再歲頗常聞所未聞中間睽攜時蒙寄以新稿聞者必爭求之丙午余待罪校讐府公自江左召甫見上即賜第長蓬山專史事未幾日又入經幄直綸省僕於公為列屬遂得時見講卷詞草諸篇每每精妙絕出無何乃以留黃不奉詔去而掖垣諸稿膾炙於人好文者至傳寫以相遺是公之連蹇不得志雖甚於諸賢而

文字之傳亦非意見不同嗜好相背者所得而抑遏也昔者李定之於東坡且以竒才見予況他人乎然世猶以全集不盡見為恨去秋余補外此來間得語從容屢以此請而公謙避再三不之許余曰莆名郡也前輩諸聞人文字散落不少夾漈著書最多可名者七百種今之存無一二艾軒沒五十年遺文始裒集僅得二十卷放失知幾何他如次雲之詩西軒之賦與先正二劉所作則世無復見者矣前之守於斯者能無愧乎僕將

逃此媿於後公獨何所靳於今此非為僕賜為國人賜也公於是不得已而出之余既盡得公所藏刊之郡齋且連月諷詠不去手乃斂衽而歎曰夫文章非一體能者互有短長王粲他文不如賦子美無韻者難讀溫公不習四六南豐文過其詩此皆前輩評論也以余觀於後村自非天稟迥殊學力深到何其多能哉詩雖會衆作而自為一宗文不主一家而兼備衆體摹寫之筆工妙援据之論精詳其錯綜也嚴其興寄也遠或春容而多

態或峭拔以為奇融貫古今自入爐鞴有穀梁之潔而  
寓離騷之幽有相如之麗而得退之之正霜明玉瑩虎  
躍龍驤閎肆瑰奇超邁特立千載而下必與歐梅六子  
並行當為中興一大家數也公名克莊字潛夫莆陽人  
後村者因其居以自號也淳祐九年龍集己酉中春既  
望竹溪林希逸書

--	--	--	--	--	--	--	--

欽定四庫全書

後村集卷一

宋 劉克莊 撰

詩

南嶽舊稿

郭璞墓

先生精數學卜穴未應踈因拊虎鬚死還尋魚腹居如  
何師鬼谷却去友靈胥此理憑誰詰人方寶葬書

魏太武廟

荒涼瓜步市尚有佛狸祠俚俗傳來久行人信復疑亂

鴉爭祭處萬馬飲江時意氣今安在城始暮更悲

徐孺子墓

今曉安墳意梅仙舊廨傍醢成龍不至羅設鳳高翔黨  
錮人俱燼先生骨尚香小詩拈未出何以侑椒漿

宿莊家二首

初秋風露變偶出憇莊家原稼無全穗陂荷有晚花疎  
鐘踰澗響微月轉林斜鄰媪頭如雪燈前自績麻

茅茨迷詰曲度谷復踰陂世上事如許山中人不知牛



羊晴卧野鷺鷺晚歸池粗識為農意秋輸每及時

北山作

骨法枯閒甚惟堪作隱君山行忘路脉野坐認天文字  
瘦偏題石詩寒半說雲近來仍喜賸閒事不曾聞

早行

店姬明燈送前村認未真山頭雲似雪陌上樹如人漸  
覺高星少纔分遠燒新何煩看猴子來往暗知津

黃蘗山

出縣半程遙松間認粉標峯排神女峽寺創德宗朝鶴  
老巢高木僧寒曬墮樵早知人世淡來往退居寮

第三龍湫

絕頂謁龍公森寒石作宮路盤青壁上瀑瀉白雲中僧  
說聞雷出人疑與海通幾時陰晦夜來此看擎空

客中作

漂泊何須遠離鄉即旅人吹薪嘗海品書刺謁田隣家  
寄寒衣少山來曉夢頻小兒仍病瘡詩句竟無神

小寺

小寺無蹊逕行時認蘚痕犬寒鳴似豹僧老瘦於猿澗  
水來旋磨山童出閉門城中梅未見已有數株繁

晚春

花事匆匆了人家割麥初雨多田有鸛潮小市無魚禿  
筆回僧簡襖衣看古書經年稀見客磬折轉生疎

哭葉孝錫教授

瘴雲深處死太息奈君何詩友俱來弔埋銘久未磨箕

裘無子繼書畫落人多舊宅今移主斜陽掩涕過

夜過瑞香菴作

夜深捫絕頂童子旋開扉問客來何暮云僧去未歸山  
空聞瀑瀉林黑見螢飛此境惟予愛他人到想稀

送薛明府

長官三載內屢被督郵嗔鎮靜答刑少公清縣庫貧減  
租霑野老掃榻待詩人祇恐鳬飛後民間事事新

蘇嶺

到此思家切寒衣半淚痕燒餘山頂禿潮至海波渾僕  
怕昏無店人言近有村吾生輸野老笑語掩柴門

示觀老

住山仍黑瘦靴錫極蕭然頭髮千莖雪跣趺一縷烟禪  
堪拈出衆詩亦長於前燒盡西窗燭相看各不眠

武步道中

一路荒涼極無端過此頻官於鹽起稅俗事盡為神瞑  
色初逢驛溪聲只隔隣留題空滿壁不見有詩人

浦城道中

纔入仙霞路重裘尚不支  
居人收柏實客子辦梅詩  
地濕然箕坐霜寒隔被知  
向來真錯計不買草堂基

幽居寺

相傳有儒者唐李隱茲  
峯電已收遺藁雲方鎖  
暮鐘木碑無世次石洞斷  
人蹤此士何曾死林深不  
可逢

大目寺

來人云虎出留此到昏鐘  
寺小於諸剎山高似衆峯  
未

寒先得雪已夏尚如冬老子曾游浙微微有辨鋒

哭容倅舅氏二首

老赴容州辟移書勸不回客迎蕭寺哭喪附海舟來瘴  
雨銘旌暗空山梵磬哀未知墳上栢此去幾時栽

尚記陪言笑如今叫不應兒分身後俸僧上殯前燈宅  
有遺基在田無一畝增問天何至此在日以廉稱

吳大帝廟

露坐空山裏英靈喚不迴久無祠祭至曾作帝王來壞

壁蟲傷畫殘爐鼠印灰今人渾忘却江左是誰開

鐵塔寺

細認苔間字方知鑄塔時不因兵廢壞似有物扶持古  
殿人開少深窻日上遲僧言明受事相對各攢眉

聰老

聰老才堪將髡緇意未平僧中能結客禪外又談兵喜  
聽詩家話多知邊地情何當長鬚髮遣戍國西營

哭薛子舒二首



醫自金壇至猶言疾可為瀕危人未信聞死世皆疑友  
共收殘藁妻能讀殮儀借來舊冊子掩淚付孤兒  
忍死教磨墨留書訣父兄讀來堪下淚寄去怕傷情墓  
要師為誌詩於世有名夜闌秋枕上猶夢共山行

贈川郭

川郭顛狂甚平生挾術游老猶携侍女貧不謫公侯用  
藥多投病訓錢或掉頭金陵官酒貴應典舊貂裘

贈錢道人

除了布裘外都無物自隨  
跣能行大雪饑但噉華池說  
相言多驗嫌錢事更奇  
一般難曉處裝背貴人詩

張麗華墓

臺上栢蕭蕭空堂閉寂寥  
芳魂三尺土往事幾迴潮  
墮翠尋難見埋紅恨未消  
猶勝江令在白首入隋朝

送鄒景仁

衝寒何處去新戌尚來年  
客勸休辭慢君言已買船  
霜清江有蟹葉脫木無蟬  
若過東林寺携家往問禪

二將

石侯  
麟仔

二將同時死路人聞亦哀力窮塵轉急圍厚突難開戰  
骨尋應在殘兵間有迴傷心郵遞裏隔日捷書來

陳虛一

幾載皖山耕忽提孤劒行戰場中有骨尺籍尚無名馬  
自尋歸路身空試賊營却疑兵解去曾說煉丹成

揚州作

幾多精甲沒黃沙野哭遙憐戰士家瓜渡月明空粉堞

蕪城烟斷只昏鴉似聞禁使傳頒醢尚喜邊人獲賜羆  
怵悵兩淮蚕織地春風不復長桑芽

南浦亭寄所思

只是從前瘦病身官卑活計太清貧買來晉帖多成贗  
吟得唐詩轉逼真擬棄家尋劍客死當移塚近騷人  
秋風爛漫吹雙鬢目送停雲欲愴神

蒜嶺夜行

嶺頭無復一人來漁店收燈戶不開松氣滿山涼似雨

海聲中夜近如雷擬披醉髮橫簫去只寄鄉書與劍迴  
他日有人傳肘後尚堪收拾作詩材

別教器之

舊說閩人苦節稀先生獨抱歲寒姿老年絳帳聊開講  
當日烏臺要勘詩東閣不游緣有氣草堂未架為無貲  
輕烟小雪孤山路折贖梅花寄一枝

哭楊吏部通老

白首除郎已晚哉民間桑柘手親栽蓋棺只著深衣去

行李空擔語錄迴主祭遺孤猶未冠著書殘藁漫成堆  
可憐薄命飄蓬客虛事江西莫府來

老歎

肘後奇書懶更開只今年髮已相催但聞方士騰空去  
不見童男入海迴無藥能留炎帝在有人曾哭老聃來  
醉鄉一路差堪向終擬劉伶冢畔埋

答友生

讀易參禪事事奇高情已恨桂冠遲清於楚客滋蘭日

貧似唐人乞米時家為買琴添舊債厨因養鶴減晨炊  
君看江表英雄傳何似孤山一卷詩

趙清獻墓

南渡先賢迹已稀蕭然華表立山陂可曾長吏修祠宇  
便恐樵人落樹枝幾度過墳偏下馬向來出蜀只攜龜  
自憐日暮天寒客不到林間讀隧碑

烏石山

客子家山亦此峯可堪投宿聽疎鐘旋沽村酒開霜柿

欲訪禪扉隔暮松鄉信寫成無便寄寒衣著綻倩誰縫  
遠來只為營瓜圃不是貪渠萬戶封

除夕

憶昔都城值歲除高樓張燭戲呼盧久依淨社參尊宿  
難向新豐認酒徒天子未知工草賦鄰人或倩寫桃符  
夜寒別有窮生活點勘離騷擁地爐

呈袁秘監

近日頻聞有峻除人傳君相重師儒細旃坐穩方輪講



羣玉峯高未要扶，別後曾過東閣否？  
新來亦乞鑑湖無，幾時供帳都門外？  
真寫先生作畫圖。

漁梁

春泥滑滑雨絲絲，一路陰寒少霽時。  
水入陂渠喧似瀑，雲從山崦上如炊。  
燎衣去傍田家火，炙燭來看野店詩。  
落盡梅花心事惡，獨搔蓬髮遠殘枝。

小梓人家

生來拙性嗜清幽，因過山家為小留。  
頂笠兒歸行樹杪，

金匱山志卷一  
提瓶婦去汲溪頭參天老竹當門碧盡日寒泉遶舍流  
我料草堂猶未架規模已被野人偷

送拄杖還僧

頭白高僧行脚嬾一枝筇竹久生苔不逢太乙然藜照  
時借山翁荷篠迴夜挂多尋蕭寺壁曉拈恐化葛陂雷  
還師此物禪須進曾入詩人手內來

雲峯寺

七里深林集暮鴉插空金碧被林遮華堂何止容千衲

菜地猶堪置萬家虎去有靈知伏弩僧來叙舊約分茶  
世人要識峯頭冷六月重綿坐結跏

蓋竹廟

借榻叢祠日已曛瓣香頻此謁靈君儻來夢事休重卜  
向去詩材進幾分明主不消人諫獵故山空使客移文  
寄書報與荆妻說十襲荷衣莫要焚

瓜州城

先朝築此要防邊不遣邊人見戰船遮斷難傳河朔檄

修來大費水衡錢書生空抱聞雞志故老能言飲馬年  
慙愧戍兵身手健箔樓各占一間眠

送仲白

官舍蕭條葦蓋簷拾薪獨有一長髯同來社友因饑瘦  
遠作參軍得俸廉國士交情窮乃見古人詩律晚方嚴  
中年各要身强健別後寒衣切記添

鳳凰臺晚眺

經月疎行臺上路秣陵城郭忽秋風馬嘶衛霍空營裏

螢起齊梁廢苑中野寺舊曾開玉帳翠華久不幸離宮  
小儒記得隆興事閒對山僧說魏公

贈王隆劉道士

觀中曾訪老黃冠爾尚為童立醮壇新染髻衣披得稱  
舊泥丹竈出來寒詩非易作須勤讀琴亦難精莫廢彈  
憶上洪崖題瀑布因游試為拂塵看

晉元帝廟

元帝新祠西郭外野人弔古獨來遊陰陰畫壁開冠劍

寂寂絲窠上環梳勢比龍盤猶在眼事隨鴻去不迴頭  
葉碑廊下無人看欲去摩娑又少留

清涼寺

塔廟當年甲一方千層金碧萬緇郎開山佛已成胡鬼  
住院僧猶說李王遺象有塵龕壞壁斷碑無首立斜陽  
惟應駐馬坡頭月曾見金輿夜納涼

冶城

斷鏃遺鎗不可求西風古意滿原頭孫劉數子如春夢

王謝千年有舊遊  
高塔不知何代作  
暮笳似說昔人愁  
神州只在闌干北  
度度來時怕上樓

雨華臺

昔日講師何處在  
高臺猶以雨華名  
有時寶向泥尋得  
一片山無草敢生  
落日磬殘隣寺閉  
晴天牛上廢陵耕  
登臨不用深懷古  
君看鍾山幾箇爭

新亭

此是晉人遊集處  
當時風景與今同  
不干鐵鑊樓船力

似是蒲葵塵柄功幾簇旌旗秋色裏百年陵闕淚痕中  
興亡畢竟緣何事專罪清談恐未公

魏勝廟

天與精忠不與時堂堂心在路人悲龍顏帝子方推轂  
猿臂將軍忽死綏灑泣我來瞻畫像斷頭公恥立降旗  
海州故老凋零盡重見王師定幾時

真州北山

憶昔邊庭入控弦官軍迎戰北山前笳簫有主安新塋



蓑笠無人墾廢田  
兵散荒營吹戍笛  
僧從敗屋起茶烟  
遙憐鍾阜諸峯好  
閒鎖行宮九十年

故宅

故宅炎炎未百年  
今看枯柳著跣蟬  
莊田置後頻移主  
書畫殘來亦賣錢  
春日有花開廢圃  
歲時無酒滴荒阡  
朱門從古多如此  
想見魂歸也愴然

送余子壽

去歲與君同聘召  
何曾杯酒暫相離  
兵謀元帥多親訪

金匱要略卷之三  
卷一  
心事同官盡得知三釜忽懷歸去檄一枰未了著殘棋  
此生聚散須牢記記上揚州戰艦時

送周監門

一領青衫似敗荷奈君母老秩卑何三年幕府無人薦  
常日柴門有客過身畔檐輕藏俸少江頭船重載書多  
故人若問軍中事為說防秋夜枕戈

挽黃巖趙郎中二首

朱公徒弟丘公壻標致雖高氣宇和心向奏篇尤暴白

髮因時事欲蒼皤  
卜傳淮甸邊情惜  
路出蕭山巷祭多  
最長郎君師友盛  
我知墓碣有人磨

青衫昔作督郵時  
賞鑒除公更有誰  
勘獄不嫌人守法  
撰文常對衆稱奇  
築臺虛辱生前意  
穿冢難訓地下知  
欲寫哀思傳挽者  
身今戎服不能詩

寄趙昌父

世上久無遺逸禮  
此翁白首不彈冠  
一生官職監南嶽  
四海詩盟主玉山  
經歲著書人少見  
有時入郭俗爭看

何因樵服供薪水得附高名野史間

寄韓仲止

昨仕京華豪未減脫鞵不問貴游嗔詩家爭欲推盟主  
丞相差教作散人閉戶自為千載計入山又忍十年貧  
幾思投劾從公去背笈肩琴澗水濱

戊辰書事

詩人安得有春衫今歲和我百萬緜從此西湖休挿柳  
剩栽桑樹養吳蠶

晚春

書幌泠泠子夜風  
杜鵑啼月小牆東  
江南詞客惜春老  
清曉披衣拾墮紅

臨溪寺二首

綠染庭蕪一尺深  
老師閱世幾駒陰  
自言不看傳燈了  
只讀楞嚴見佛心

一徑松花颭紫苔  
東風落盡佛前梅  
道人深掩禪關坐  
莫聽鶯聲出定來

即事

自汲新泉養牡丹銀壺滿貯怕春殘畫簷一向東風惡  
為掩窻綃護晚寒

孺子祠

孺子祠堂揮酒旗游人那解薦江蘿白鷗欲下還驚起  
曾見陳蕃解榻時

碧波亭

了却文書上馬遲白蘋洲畔有心期斜陽忽到傳觴處

落盡梨花啼子規

豫章溝

溝水泠泠草樹香  
獨穿支徑入垂楊  
薺花滿地無人見  
唯有山蜂度短牆

野店蕭蕭掩竹門  
岸沙猶記履綦痕  
東風枉是吹花急  
綠盡平蕪却斷魂

題寺壁二首

栢子薰衣眉暈銷  
女垣榆影冷蕭蕭  
屏山一枕游方夢

橫錫飄然過石橋

素練寬裁白社衣  
普陀烟裏現幽姿  
日長讀徹楞伽了  
閒折柑花供祖師

西山

絕頂遙知有隱君  
食芝種朮鹿為羣  
多應午竈茶烟起  
山下看來是白雲

宮詞四首

出海新蟾玉半鉤  
風翻荷蕩起栖鷗  
女郎定有穿針約



偷看明河記立秋

涼殿吹笙露滿天  
木犀花發月初圓  
君王少御珊瑚枕  
多就宮人玉臂眠

一夜秋風入碧梧  
蟬聲永巷月華孤  
幾回夢裏羊車過  
又是銀牀轉轆轤

先帝宮人總道妝  
遙瞻陵柏淚成行  
舊恩恰似薔薇水  
滴在羅衣到死香

秋風

黃葉蕭蕭忽滿堦  
獨騎瘦馬豫章臺  
莫將宋玉心中事  
吹向潘郎鬢畔來

跋小寺舊題

禪几曾陪白氎巾  
柑花似雪鬪芳新  
而今柑子圓如彈  
不見澆花供佛人

憶殤女

靈照羈魂章水西  
冷風殘雪古招提  
老懷已作空花看  
更把楞嚴曉病妻

報恩寺

一抹斜陽上繚垣  
芫花滿地柏陰繁  
城中客子聞鐘去  
獨立空山聽斷猿

歸至武陽渡作

夾岸盲風掃棟花  
高城已近被雲遮  
遮時留取城西塔  
篷底歸人要認家

舟中寄景建

低篷小雨夢殘時  
忽憶同尋楚老祠  
夜過豐城占斗氣

想公別後有新詩

書山壁

剏地栽林自起墳一燈精舍疏玄文詩成莫洒酒家壁  
題徧青山題白雲

華嚴寺逢舊蒼頭

曾向叢林寄幅巾十年塵浣卧雲身侍琴童子長於竹  
去禮山僧作主人

田舍

稚子呼牛女拾薪菜妻自鱸小溪鱗安知曝背庭中老  
不是淵明一輩人

古墓

石麟闕耳筍生苔要讀豐碑與客來精舍荒涼僧已出  
瓦牆一朵佛桑開

題本草

勤讀方書不爲身里中者舊半成塵幾時作箇荒山主  
多種黃精售與人

下蜀驛

幄殿荒涼屋欠扶，紹興遺老故應無。  
舊來曾識高皇帝，尚有庭前柳一株。

出郭

江邊一雨洗秋容，北郭東郊野意濃。  
老大怕它人檢點，隔溪隔柳看芙蓉。

病起

病起登樓怯曉風，愛他殘雪映前峯。  
傍人休問何郎瘦。

不見梅花過一冬

再贈錢道人二首

拙貌慙君仔細看  
鏡中我自覺神寒  
直從杜甫編排起  
幾箇吟人作大官

尋師入蜀未曾逢  
要看羅浮曉日紅  
若見仙人知去處  
却來相引到山中

後村集卷一



欽定四庫全書

後村集卷二

宋 劉克莊 撰

詩

南嶽第一稿

蒙恩監南嶽廟

久問嫖姚乞退閒  
今朝準勅放生還  
人欺解罷青油幕  
帝遣監臨紫蓋山  
營卒展辭回玉帳  
林僧講賀到柴關  
丈夫不辦封侯事  
猶要名標處士間

烏石山



兒時逃學頻來此一一重尋盡有蹤因瀉戲魚羣下水  
綠敲響石鬪登峯熟知舊事惟鄰叟催去韶華是暮鐘  
畢竟世間何物壽寺前雷仆百年松

葺居一首

兵火間關髮欲絲歸來聊卜草堂基架留手澤書堪看  
爨有躬耕米可炊畏濕先開通水竇貪明稍斫近簷枝  
旋移梅樹臨窻下準備花時要索詩

挽郭處士

昔聞東郭先生者處士寧非是遠孫空有新詩喧一邑  
竟無明詔老孤村雷琴酷愛應同殉草字尤工惜不存  
復說歸從葱嶺去騷成何路可招魂

老將一首

昨解兵符歸故里耳聽邊事幾番新偶逢戲下來猶識  
欲說遼陽記不真兒覓寶刀偏愛惜奴吹蘆管輒悲辛  
夜寒忽作關山夢萬一君王起舊人

老馬一首

脊瘡蹄蹇瘦闌干火印年深字已漫野礪有冰朝洗怯  
破坊無壁夜嘶寒身同退卒支殘料眼見新駒鞞寶鞍  
昔走塞垣如抹電安知末路出門難

老妓一首

籍中歌舞昔馳聲憔悴猶存態與情愛說舊官當日寵  
偏呼狎客小時名薄鬟易脫梳難就半被常空睡不成  
却羨鄰姬門戶熱隔樓張燭到天明

挽趙仲白二首

生被才名譴摧殘到死休家留遺稿在棺問故人求對  
月悲孤詠逢山憶共遊昔年攜手地今送入松楸  
昨弔寢門外萊妻泣最悲因言兒上學復為墓求碑零  
落燒丹訣淒涼哭鶴詩託孤朋友事非謂九泉知

贈風水僧

向人說葬又談空郭璞瞿曇併入宗背得山經如誦呪  
頂將禪笠去尋龍徧為檀越栽生壙預定公侯出某峯  
想亦自營歸寂處一丘外塔種青松

挽鄭夫人二首

李尚書母

九秩復何憾生榮沒更哀閨門天下則地位佛中來貝  
葉從頭看庭槐一手裁侍兒聞曉磬猶恐坐禪迴  
昔事征西幕年年拜壽闈那知丹旄至曾勸板輿歸元  
帥拋金印諸生返布衣感恩惟有淚來向路傍揮

除夕

除夕陰寒怕捲簾雨聲斷續下疎簷壁穿自和乾泥補  
窻損教尋廢紙粘祇有青燈相守定縱無白髮亦生添

更殘自笑明年事不就君平卦肆占

挽鄭淑人

李尚書內

憶在軍中為記室謝公門館事皆知謙卑若婦初嬪日  
儉素猶夫未貴時病了死生惟點首晚憂家國每顰眉  
舊人獨有任安在攬涕西風獻此詞

悼阿昇

實惜吾兒如拱壁那知變滅只須臾畏啼尚宿通宵火  
塗頤猶殘隔日朱坐客相寬云夢幻故人來弔訝清癯

荒山歲晚無行迹心折原頭樹影孤

送真舍人帥江西八首

諫書元不為求名上有穹蒼鑒至誠徼外傳觀皆動色  
豈知難悟漢公卿

聞道泉人截轡留翰林從此去吾州村中父老相持泣  
但祝今侯似故侯

舶客珠犀湊郡城向來點浣幾名卿海神亦歎公清德  
少見歸舟箇樣輕



應對詆諧路亦開漢家天子日招徠當時惟有膠西相  
不向平津閣裏來

淮漢沅沅戰血腥蜀山鬼哭不堪聽如何一綫江西路  
獨現奎星與福星

自昔安危等置棋繫人著數匪天為何因國手來當局  
要看開奩布子時

少小聞人說復讎至今禾黍徧宗周自憐謝病離軍去  
始聽王師下海州

身已為民與世疎的無一步離村居昨朝出郭遲公至  
廢了窻間數葉書

與客送仲白莖回登石室

絕頂荒寒斷客過偶携之子共捫蘿縱觀天外皆鯨浸  
下視城中等螳窠悼友孤懷方濩落逢僧逆境暫銷磨  
夜歸剩乞松明火霜滿前山滑處多

立春二首

恰歸舊隱再逢春村巷荒涼草没人犬壞園中門作竇

盜規墳上樹為薪官如巫祝難羞賤家似樵漁敢諱貧  
聞說鄰醅低價賣病夫一滴未沾脣

今歲春盤始住家也勝羈旅走天涯圃晴菜折經霜甲  
林暖梅飛徧地花閒有工夫憂世事老無勲業惜年華  
近來死盡吟詩者得句聊從野叟誇

去春

去春烽火照江邊曾草軍書夕廢眠萬里旌旗真屬命  
一丘耕釣且隨緣偶然謝客元非病間亦尋僧不為禪

尚有惜花清味在銅瓶終日玩芳妍

燈夕

千炬金梔映玉蕖臺城昨夢又年餘斷無絃索鳴華屋  
惟見炊烟起草廬兒報瓶空因止酒婢言油盡暫停書  
蓬窻亦有精勤士何必然藜向石渠

戲孫季蕃

少日逢春一味癡輕鞭小袖趁芳時常過茶邸租船出  
或在禪林借枕歌名妓難呼多占定好花易落況開遲

身今憔悴投空谷悔不當年秉燭嬉

匹馬

匹馬曾經小店炊一株玉雪映疎籬無言誰識含情處  
有韻全看背面時乍見心方驚絕艷重來人已折繁枝  
斷烟殘照山村路消得劉郎一首詩

宿囊山懷洪岳二上人

憶在山中識二僧一亡一已拂衣行壁間笠徒名籃掛  
寺外松過壽塔生隴月定知今夕恨澗泉猶咽舊時聲

隔房侍者皆新剃不以間人却有情

訪辟支巖絕頂二僧值雨

聞有比丘隱絕巔多年無跡下山前僧稱功行幾如佛  
樵說神通復近仙食少僅炊盈握米身寒不挂半銖綿  
重巖風雨妨遊陟回眺蒼烟一惘然

送王實之赴長沙幕

敘試第  
四人

賈傅遺蹤在君於此泛蓮不應卑濕地猶著廣寒仙策  
好人爭誦名高士責全衡山余所管擬結草屨緣

哭豐宅之吏部二首

江表依公稍自強，訃聞朝野共淒涼。  
蠹移北府兵皆散，笳返西州宅已荒。  
舊戍交鋒淮水赤，新墳埋劍越山蒼。  
此身虛作田橫客，血淚無因滴壠旁。

康時才業未全伸，晚見油幢白髮新。  
畚土為城塵滿面，握拳猶戰胆通身。  
一生徧任公家怨，四海皆知後事貧。  
多少貴交方厚祿，恤孤弔墓屬何人。

涑村

身老深村負歲華青苔逕裏是貧家晚風一陣無端惡  
不為山人惜袖花

挽林進士

一門皆擢第君獨老儒冠試卷年年納經書日日看文  
為前輩賞命合主司難遙想泉臺恨銘旌未寫官

東人求驢子

聞在江寧得小驢價高人說是名駒行時亦肯過橋否  
饑後還能飲澗無不稱金鞍馱侍女只宜席帽戴貧儒



灞陵雨雪詩家事乞與他年做畫圖

寄漢陽守王中甫

自辭莫府徑歸耕同舍分携闕寄聲  
帳下飛書空有草軍中上級獨無名  
山深僕不聞時事塞近君應得敵情  
聞道漢東堪卧治訊來依舊說招兵

與客登壺山絕頂

十里稀逢寸地平且無木影蔭人行  
鳬飛難學王喬舄魚貫全如鄧艾兵  
樵子獻花簪帽重山靈供水入瓢清

金匱先生集卷二  
捫蘿莫怪匆匆下恐賺林僧束炬迎

戲谷同游

君到中峯力不加却疑絕頂事皆誇  
烟含晚市微分塔日照鄰州近隔沙

次方武城壺山韻

圖經云此有神仙曾見壺公跳入年  
斫木人多山漸瘦結菴僧去石誰眠  
鳥歸半嶺銜斜日樵返疎村起遠烟  
君若能拋塵裏事一龕共占野雲邊

挽林推官內方孺人

艾軒侍郎子婦

身畔無釵澤何由  
葬禮奢明時選人婦  
先帝近臣家白首  
持巾悅青燈緝苧麻  
寺西同窆處風日愴寒茹

方湖泛舟得南字

湖波烟雨綠如藍  
小艇閒携客二三  
墜絮飈萍生細浪  
驚魚避鷺沒深潭  
入荷似覺傍無岸  
穿石方知上有巖  
却凭朱樓同望海  
一規寒玉帖西南

空寂院

金匱山房詩集 卷二  
院名誰遣稱空寂入得門來寂又空舊有田園官戶占  
別無衣鉢老尼窮砌傾苔色侵堂上厨廢炊烟起草中  
或說古碑巢寇寫栖禽不下似傷弓

紫澤觀

修持盡是女黃冠自小辭家學住山簾影靜垂斜日裏  
磬聲徐出落花間祭星綠簡親書字避客青衣密掩關  
最愛粉牆堪試筆苦無才思又空還

靈寶道院

兩行松繞垣數箇竹當軒山主出何處道人知不言只  
携詩草至尚覺磬聲煩俗奉醫仙謹儒家有捨旂

方寺丞新第二首

宅成天下借圖看始笑書生眼力慳地占百弓多是水  
樓無一面不當山荷深似入茗溪路石怪疑行鴈蕩間  
只恐中原方鼎沸天心未遣主人閒

一生不蓄買田錢華屋何心亦偶然客至多逢僧在坐  
釣歸惟許鶴隨船按行花木皆僚友主掌湖山即事權

京洛貴人金谷裏安知世上有林泉

小齋

小齋自理畫并琴匣貯香薰怕蠹侵出塞已忘傳檄夢  
入山猶有著書心南船不至城無米北貨難通藥闕參  
却為貧居還往少門前留得綠蕪深

東巖寺避暑

若非來寺裏無地避炎蒸經雨房基潤依山井氣冰榻  
虛涼睡客松濕滴歸僧對此專宜靜為詩亦不應

方奇丞艇子初成

船成莫厭野人過久欲從公具釣蓑  
積雨晴來湖面濶殘花落盡樹陰多  
新營野店皆依柳舊有危亭尚隔荷  
所恨前峯含暝色不然和月宿烟波

友人病瘡

自檢方書坐一牀教尋蒿白采蒲黃  
畫眉連日疎妝閣鍊氣通宵住道房  
倦聽瀑聲令睡醒悶拈詩卷遣心涼  
猶勝華髮從軍客歸卧茅簷養戰瘡

乍暑一首

南州四月氣如蒸，却憶吳中始賣冰。  
綠浦遊船常載妓，畫廊浴鼓或隨僧。  
夢過水榭聞涼笛，身在山房伴曉燈。  
怱悵烏絲欄上筆，蓬窻學寫字如蠅。

衛生

衛生草草昧周防，小郡無醫自處方。  
採下菊宜為枕睡，碾來芎可入茶嘗。  
身因病轉添蕭颯，人到衰難再盛強。  
舊喜讀書今亦懶，銅爐漫炷一銖香。



先儒

先儒緒業有師承  
非謂聞風便服膺  
康節易傳於隱者  
濂溪學得自高僧  
衆宗虛譽相賢聖  
獨守遺編當友朋  
門掩荒村人掃迹  
空鈔小字對孤燈

同孫季蕃游淨居諸菴

捨俗依空事梵王  
韶顏寂寂度年芳  
門前草色迷行徑  
院裏花陰接步廊  
弓樣展來靴尚窄  
黛痕剝出頂新涼  
當時若使窺鸞鏡  
一步何因出洞房

又一首

滿院靜沉沉微聞有梵音不來陪客語應恐壞禪心  
母處歸全少師邊悟已深戒衣皆自衲因講始停針

孟夏汎方湖得同字

長笛橫吹露滿空施行渾不辨西東岸回初見遙峯出  
浦盡新疏別港通月照鷺身明石畔風翻螢影沒荷中  
書生此樂關時命歎息無因夜夜同

又得湖字

帝賜先生一曲湖，畫船領客汎菰蒲。  
覆茅亭子尋猶遠，隔柳人家看似無。  
渴嗜瀑泉頻遣汲，醉行釣岸屢嗔扶。  
假令不立功名死，史筆須編入酒徒。

問友人病

病來清瘦欲通仙，深炷香篝掃地眠。  
野客勸尋廉藥買，外人偷出近詩傳。  
術庸難靠醫求效，俗陋多依鬼乞憐。  
鷗鷺如欺行迹少，分明溪上占漁船。

偶賦

身已深藏畏俗知客來鄰曲善為辭偶彈冠起成何事  
徑拂衣歸自一奇村飲婦常留燭待山行童亦挾書隨  
明時性學尤通顯却悔從初業小詩

滄浪館夜歸二首

萬疋沙場似電奔轟天笳吹簇轅門而今出借東家馬  
烟雨孤行小麥村

立馬飛書萬衆看雪花滿硯指皆寒自憐衰憊今如此  
枕上裁詩字未安

贈翁定

相逢乍似生朋友坐久方驚隔濶餘徧問諸郎皆冠帶  
自言別業可樵漁住鄰秦系曾居里老讀文公所著書  
十七年間如電瞥君鬚我髮兩蕭疎

送孫季蕃

家在吳中處處移的於何地結茅茨囊空不肯投牋乞  
程遠多應稅馬騎短劒易錢平近債長鉶傾酒話餘悲  
衡山老祝淒涼甚明日無人共講詩

哭毛易甫

至尊殿上主文衡誰料臺中有異評垂二十年猶入幙  
後三四榜盡登瀛白頭親痛終天訣丹穴雛方隔歲生  
策比諸儒無媿色自緣命不到公卿

月下聽孫季蕃吹笛

孫郎痛飲橫長笛玉雪胸襟鐵石顏解噴清霜飛座上  
能呼涼月出雲間病創凍馬嘶荒塞失侶窮猿叫亂山  
可惜調高無聽者紫髯白盡髭毛斑

哀陳璫

滿懷干世策自請戍邊城不得兵書力翻成禮部名妓  
方調錦瑟客已弔丹旌都下人來說還因喜喪生

題方武城詩草

性僻愛詩如至寶借君詩卷百迴看吟來體犯諸家少  
改定人移一字難東瀑為題猶天矯吞山入句尚蒼寒  
嗟余老鈍資磨琢安得同衾語夜闌

送劉連江之官

舊說土風淳今聞未易馴勢侵官府弱稅去縣衙貧襍  
印辭州遠開軒與海鄰中朝裁豸者多用滿歸人

挽柯東海

不持寸鐵霸斯文疇昔曾將胆許君撰出騷詞奴宋玉  
寫成帖字婢羊欣喪無歸費人爭賻詩有高名敵亦聞  
昨覽埋銘增感愴累累舊友去為墳

送客

騎驢送客一壺隨汗透中單熱似炊客又不來天落雨



路邊茅舍坐移時

哭王宗可

昨現官身往今迎影子迴  
揔云鳬入覲誰料鵬為災  
巷靜公人去門荒弔客來  
故園花滿架猶似去年開

書考一首

香火精勤閱一暮孤臣無路荅鴻私  
銜如已廢陳人樣俸比初開小學時  
世上升沉姑付酒考中供狀是吟詩  
五錢買得羊毛筆自寫年勞送有司

哭常權

予主靖安縣簿君為令

曾佐下風山縣裏長官貴重若神明行香野寺徐方至  
白事琴堂久始迎遠遞無書悲契濶老襟有淚愴生平  
郎君如玉聞先天誰護丹旌問去程

穴蟻一首

穴蟻能防患常於未雨時聚如營落日散似去邠時斷  
續緣高壁周遭避淺池誰為謀國者見事反傷遲

方寺丞除雲臺觀

河嶽淪胥憤未忘  
羨公遙領舊靈光  
草荒太白騎驢跡  
雲冷希夷委蛻裳  
定有遺民來獻土  
可無散吏去焚香  
吾聞同華多奇觀  
不比炎州寂寞鄉

哭方主簿伋

鶉衣不似擁千金  
用破燈窓一世心  
太學空聞能賦久  
春官未察讀書深  
柴車巾出身猶健  
槐簡拈歸病已侵  
寂寞殯宮來客少  
故人野外獨沾襟

陳寺丞續易杖譜

蔡公絕筆山川歌  
荔子蕭條二百年  
選貌略如唐進士  
幕名幾似晉諸賢  
豈無品劣聲虛得  
亦有形佳味不然  
題徧貴家臺沼後  
請君物色到林泉

棋

十年學奕天機淺  
技不能高謾自娛  
遠聽子聲疑有著  
近看局勢始知輸  
危如巡遠支孤壘  
狹似孫劉保一隅  
未肯人間稱拙手  
夜齋明燭按新圖

宿千歲菴聽泉

因愛菴前一脉泉  
襍衾來此借房眠  
驟聞將謂溪當戶  
久聽翻疑屋是船  
變作怒聲猶壯偉  
滴成細點更清圓  
君看昔日蘭亭帖  
亦把湍流替管絃

題方寺丞西重山瀑布亭

與客窮源上盡山  
林霏初卷嶺泥乾  
似嫌甲第施朱戟  
別築茅亭俯碧湍  
龍怒豈容緣磴汲  
瀑寒不敢近崖看  
平生粗有登臨胆  
今日凭高立未安

秋夜有懷傳至叔太博父子

憶昔遊君父子間，高才窮力莫追攀。  
讀書衆壑歸滄海，下筆微雲起太山。  
幼嗣尚存宗武在，遺文難附所忠還。  
荒丘衰草埋雙壁，兀坐空齋涕自潛。

書小窻所見

榦接枝分整復斜，隨緣裝點野人家。  
小窻有喜無人見，蘭在林中出一花。

哭宋君輔倚

早題淡墨魁多士，晚著青衫事護軍。  
方見叔孫來議禮，

已傳子夏去修文先朝繅藉為主壁近世摧殘用斧斤  
回首冶城棋飲地鴈悽蟬咽不堪聞

曝書一首

秋齋近午氣尤炎命僕開廂更發奩蟲蝕闕文勞注乙  
嵐侵脫葉費裝黏雲迷玉帝藏書府日在山人炙背簷  
誰道閒居無一事袒衣揮扇曝芸籤

觀元祐黨籍碑

嶺外瘴魂多不返冢中枯骨亦加刑稍寬末後因奎宿

暫仆中間得彗星蚤日大程知反覆莫年小范要調停  
書生幾點殘碑淚一弔諸賢地下靈

荅翁定

牢落祠官冷似秋賴詩消遣一襟愁喜延明月常開戶  
貪對青山懶下樓客詫瀑竒邀往看僧誇寺僻約來游  
何當與子分峯隱饑嗅巖花渴飲流

挽陳潮州伯霆

當年舍選最居優上到青雲亦白頭律賦數篇天下誦



遺書幾卷館中留入游太乙曾臨地出牧昌黎所典州  
耆舊凋零今欲盡傷心笳吹掩新丘

聞城中募兵有感

調發年多籍半空虎符招補至閩中莊農戎服來操戟  
太守儒裝學拍弓去日初辭鄉樹綠到時愁見戍旗紅  
募金莫作纏頭費留製衣袍禦北風

昔在軍中日募兵萬夫魚貫立行營懸金都市招徠廣  
立的轅門去取精二石開弓猶恨少雙重被鎧尚嫌輕

五符今屬他人手歷歷空能記姓名

哭張玉父

華髮客朱門文高道又尊十分窮不屈一片氣長存  
籬掩湖邊宅墳依郭外村二孤彈舊缺泣感孟嘗君

友人病瘵

昔聞詩可驅瘵疾今日詩人疾自嬰勢似邊兵鏖未解  
根同野草剗還生能蠲熱障惟山色解洗煩襟只澗聲  
溪友祝君如虎健督僧栽種課奴耕

書事二首

黃旗旁午責軍需  
括匠搜船遍里閭  
士稚去時無鎧仗  
武侯屯處有儲胥  
粟空都內憂難繼  
甲出民間策恐疎  
昔補戎行令簡汰  
空搔短髮看兵書

人道山東入職方  
書生胆小慮空長  
遺民似蟻饑難給  
俠士如鷹飽易揚  
未見馳車修寢廟  
先聞鑄印拜侯王  
青齋父老應流涕  
何日鸞旗駐路傍

李文饒一首

金史四庫全書  
卷二  
畫取維州如槁葉策禽潞將似嬰兒九原精爽人猶畏  
想見中書秉筆時


西風二首

性愛芙蓉淡復穠倚欄日日待西風池邊數本無消息  
愁絕東家半樹紅

老業猶存事苦吟或投野店憇寒林西風何處無詩料  
水際山巔亦去尋

昔仕

昔仕年傷早今歸計恨遲  
賴存南嶽草可答北山移



後村集卷二

欽定四庫全書

集部

後村集卷三

四

詳校官庶吉士臣吳烜

主事臣呂雲棟覆勘

總校官進士<sub>臣</sub>朱鈐

校對官主事<sub>臣</sub>陳文樞

謄錄監生<sub>臣</sub>鄒世俊

欽定四庫全書

後村集卷三

宋 劉克莊 撰

詩

南嶽第  
二鵠

九日次方寺丞韻

木落山凋水見涯  
感時短髮半蒼華  
人陪桓大將軍宴  
誰管陶潛處士家  
砧動寒衣貧未剪  
杯空鄰酒貴難賒  
病身索漠如黃蝶  
繞匝籬邊未有花

戲鄭閩清灼艾



點穴不須醫針經手自披既云丹熟後焉用火攻為簡  
出創牽步端居痛上眉閉門功行滿應有解飛時

瞑色

暝色千村靜遙峯帶淺霞荷鋤歸別墅乞火到隣家疎  
鼓聞更遠昏燈見字斜小軒風露冷自起灌蘭花

示寶上人

昔尋老岳到菴西岳死菴空路已迷師舉舊詩余不記  
茫然恐是夢中題

海口官舍

曉起齋中望千家未啟扉潮能驅海走風欲挾人飛烟  
寺鐘初定霜林葉半稀客身偏畏冷著盡帶來衣

瑞峯寺

寺在高山頂天寒偶一登孤僧營粥飯諸佛闕香燈潮  
落洲分派林疎塔見層危欄宜老眼欲去幾回凭

瑞巖

金碧千間盡惟菴免劫灰佛歸何國去僧自別峯來巨

石神鞭至懸崖帝鑿開幽情尋未已木杪夕陽催

荅湯升伯因悼紫芝

紫芝曾說子能詩開卷如親玉樹枝古佛寫成翻水偈  
天仙遺下步虛祠的然沈謝何難識逝矣應劉不可追  
寂寞西湖三尺墓誰携斗酒一澆之

有中貴人墓紫芝于西湖之上

挽林宜人

曾究西方學儒書亦習聞賜金存日施遺珥病時分白  
首夫同穴青山子結墳吾詩非溢美字字考埋文

送葉知郡

未

家在春風住二年借侯無路意悽然到來不飲官中水  
歸去難謀郭外田燈遠村民多點塔擔輕津吏易排船  
壺公亦似追程送青過囊山古寺前

送人赴廬陵尉

聞說江西路而今不宿師省民來著業少府去吟詩夜  
月營門鼓春風射圍旗雖然溪峒事閒暇要先知

別翁定宿瀑上

偶送詩人共宿山擁爐吹燭聽潺湲已修茗事將安枕  
因看梅花復啟闌崖色無苔通磴底月光如練林林間  
平生所歷同郵寄獨到菴中不忍還

身在一首

身在樵村鉤瀨行秋毫不與市朝爭目云嗜酒相繩急  
謗到吟詩所犯輕沉水一銖銷永晝蠹書數葉伴殘更  
閉門孤學無窮味笑殺韓公接後生

臘月十日至外祖尚書家

古樹暗朱門空堦篆蘚痕昔容萬間屋今止數家村泉  
少池因廢田荒廩尚存遺書零落盡身愧史遷孫

命拙

命拙躬耕逢歉歲旋營水菽度晨昏晴天田舍禾歸窖  
臘日山家酒滿盆護竹短牆修復壞澆花小井汲來渾  
早知不是封侯相蓑笠何因肯出村

憶真州梅園

當年飛蓋此追隨慘淡淮天月上時樹密徑鋪氍毹共飲

花寒常怕笛先吹心憐玉雪空成夢塵暗關山阻寄詩  
縱使京東兵暫過可無一二斫殘枝

歲晚書事十首

荒苔野蔓上籬笆客至多疑不在家病眼看人殊草草  
隔林迢遞見梅花

日日抄書懶出門小窻弄筆到黃昏了頭婢子忙勻粉  
不管先生硯水渾

踏破儂家一徑苔雙魚去換隻雞回幸然不識贅牙字

省得閒人載酒來

書生元不信機祥老去無端慮事詳  
白髮社巫云日吉  
明朝渫井更苦墻

鬱壘鍾馗尚改更青雲變幻幾公卿  
人間止有章泉叟  
撲斷衡山了一生

細君炊秫婢繰絲綵勝酥花摠不知  
窻下老儒衣露肘  
挑燈自揀一年詩

門冷如水儘不妨由來富貴屬蒼蒼  
誰能却學癡兒女



深夜潜燒祭竈香

歲晚村居苦寂寥日高鹽酪去城遙深深榕逕苔牆裏

忽有銀釵叫賣樵

主公晚節治家寬婢慣奴驕號令難圃在屋邊慵種菜

井臨砌畔怕澆蘭

丐客鶉衣立戶前豈知儂自窘殘年染人酒媪逋猶緩

且送添丁上學錢

元日

元日家僮催蚤起起搔令髮惜殘眠未將柏葉簪新歲  
且與梅花叙隔年甥侄拜多身老矣親朋來少屋蕭然  
人生智力難求處惟有稱觴阿母前

寄題李尚書秀野堂一首

江上歸來兩鬢絲倒囊惟剩草堂貲雲山有態爭呈獻  
天海無邊入指麾怪石遠從商舶至名花多是別州移  
寄聲獨樂先生說世事而今尚可為

又真止堂一首

作堂肯以止為名出處遙知講已精縱使胸中橫綠野  
未應度外置蒼生波顏公獨能山立漏盡人方喜夜行  
千載英雄須冷笑孔明回首學淵明

晚悟

晚悟才為崇深居學養生乃知景升子差勝少游兄絕  
澗攜餅汲空山抱耒耕兒孫聽苦語世世勿談兵

書燈

童子糊新就籠紗碧色深喚回少年夢照見古人心每

對忘甘寢頻挑伴苦吟與君交到老莫慮棄墻陰

書感

髭髥馳逐少年場晚向深山入老莊名以馬牛猶不校  
嘲為狔犬極何妨性疎熟客來難記意懶生書讀易忘  
却笑癡人誤標榜賢愚千古共茫茫

山茶

青女行霜下曉空山茶獨殿衆花叢不知戶外千林編  
且看盆中一本紅性晚每經寒始折色深却受日微烘

人言此樹尤難養暮溉晨澆自課僮

落梅

一片能教一斷腸  
可堪平砌更堆牆  
飄如遷客來過嶺  
垂似騷人去赴湘  
亂點莓苔多莫數  
偶黏衣袖久猶香  
東風謬掌花權柄  
却忌孤高不主張

又一首

昨夜東風幾陣寒  
心知尤物久留難  
枝疎似被金刀剪  
片細疑經玉杵殘  
痛叱山童持帚去  
苛留野客坐苔看

月中徙倚憑空樹也勝吳兒賞牡丹

野性

野性無羈束人間毀譽輕客言詩惹謗妻諫酒傷生  
窻納鄰峯碧瓢分遠澗清近來尤少睡打坐到鐘聲

懷保寧聰老

秣陵一見歎魁梧每恨斯人不業儒幾度劇談俱抵掌  
有時大醉勸留鬚探梅尚憶陪山屐煨芋何因共地爐  
我已休官師退院肯來林下卓菴無

哭五一弟二首

未冠辭家出麻衣不肯迴瘦因身久客貧為性疎財精力書中去科名病裏來空傳場屋義留與鋪家開  
自小即相依天涯影伴飛共燈抄細字分俸贖寒衣已  
痛身長訣猶疑客未歸素幃惟幼女斷續哭聲稀

腰痛

偶得休文病行遲卧不安益綿身尚怯加劑脉猶寒扶  
出看山易驅教立雪難邊頭方募士自愧已衰殘

上冢

落梅萬點曉泥乾  
擘紙携家去上山  
寧與先君遊地下  
肯隨謫子乞墻間  
醵牆漬雨顏偏易  
沙土栽松長極艱  
畢竟有慙廬墓士  
林扉夜只付僧關

平牀嶺

以下十二首  
辛巳遊山作

一動非容易三年議始成  
情人挑旅橐買紙劄山程  
下嶺峯如拜登崖樹若迎  
暫無塵事汨便覺長吟情

溪西



暮止溪西宿喧呼聒四隣滿村無別姓比屋喜生人解  
榻勤為黍烘衣許覓薪客房惟有月偏照不眠人

夾漈草堂

嶺絕瀑源窮曾於此築宮得知千載上因住萬山中廢  
址苔荒盡遺書電取空高皇南渡始却議及招弓

棋山院

昔日棋山院今惟認土丘有僧逃債去無主施錢修野  
叟樵難禁崑僊奕未休何須悲幻境佛比作浮漚

西林寺

將謂如廬阜因迂數里行問俱無古迹來等慕虛名借  
榻眠難熟逢碑眼暫明殘僧逃似鼠難結社中盟

興化縣

繞縣百千峯初疑路不通居民猶太古令尹似春風  
遠呼難至杯寒吸易空却從歸路望飛榭半天中

麥斜

諺比武夷君來游稱所聞  
高開花似染洞出氣如雲屋

老殘詩在崖枯小篆焚只疑龕室內猶有艾軒文

鯉湖

凡是龍居處皆難敵此泉下窮源至海上有穴通天小  
派猶成瀑低峯亦起烟莫疑乘鯉事能佳即能仙

蔡溪巖

陳聘君  
隱處

愛瀑戀苔磯難招出翠微死因巖作墓生以石為扉已  
歎逃名是猶嫌學佛非後來無此士不但鶴書稀

九座山

化盡開山物，惟存宰堵坡。  
俗傳潭出雨，僧說火因魔。  
舊給唐綾暗，新鐫蔡字訛。  
巖前觀蟒石，尤覺可疑多。

### 香山寺

佛廢何關儒者事，要知開創亦辛勤。  
居人公拆純櫺柱，巨室深藏舊記文。  
鐘已毀，樓移出，寺石猶鐫字，徒為墳。  
吾詩句句通陰騭，安得檀那子細聞。

### 仙遊縣

不見層崗與複崑，眼中夷曠似江南。  
烟收綠野連青嶂，

樹闕朱橋映碧潭丞相無家曾住寺聘君有字尚留菴  
荒山數畝如堪買徑欲誅茆老一龕

觀溪西子弟降仙

似有物憑箕傍觀競卜疑曾從師授易肯問鬼求詩  
穴雖高枕乾坤尚奕碁老儒心下事未必紫姑知

自昔

自昔英豪忌苟同此身易盡學難窮習為聯絕真唐體  
講到玄虛有晉風螳子盡云叅妙喜乞兒自許議荆公

安知斯世無顏閔到死浮沉里巷中

耕仕

耕不逢年仕背時蕭然井臼掩茅茨貧求生墓為謀早  
病學還丹見事遲馬上功名成畫餅林間身世似持碁  
未應對客呈饑面尚有荒園可種葵

真母吳氏挽詞二首

系出自華宗來嬪隱約中貧能安苦節貴愈積陰功立  
志如歐母生兒似富公如聞新寔處神告在溪東

族昔多名壻今觀子更奇他年槐樹識早歲栢舟詩割  
股延姑壽抽簪活衆饑事皆堪入史何必墓傍碑

蘭

深林不語抱幽貞賴有微風遞遠馨開處何妨依薜砌  
折來未肯戀金瓶孤高可挹供詩卷素淡堪移入卧屏  
莫笑門無佳子弟數株濯濯映堦庭

感昔二首

談攻說守漫多端誰把先朝事細看棄夏西陲忘險要

失燕北面受風寒  
傍無公議扶種李  
中有流言沮范韓  
寄語深衣揮麈者  
身經目擊始知難

先皇立國用文儒  
奇士多為禮法拘  
澶水歸來邊奏少  
熙河捷外戰功無  
生前上亦知強至  
死後人方誅尹洙  
螻蟻小臣孤憤意  
夜窻和淚看輿圖

山丹

偶然避暑過民舍  
一本山丹恰盛開  
種久樹身膠似蓋  
澆頻花面大如杯  
怪疑朱草非時出  
驚問紅雲甚處來



可惜書生無事力千金移入畫欄栽

燕二首

曾客烏衣看落花春風吹影傍天涯茅簷亦有安巢地  
何必王家與謝家

野老柴門日日開且無欄檻礙飛迴勸君莫入珠簾去  
羯鼓如雷打出來

過永福精舍有懷仲白二首

永福招提小步廊憶携詩卷共追涼年來行處常迂路

纔近君家即斷腸

一樹梅花掩舊居  
主人仙去客來疎  
白頭留得吟詩友  
每見郎君勉讀書

詠史二首

敵入中原力不支  
洛陽名勝浪相推  
可憐揮麈人如壁  
半夜排牆尚未知

保惜金甌未必非  
臺城至竟亦灰飛  
隱侯老任梁朝事  
却為閒情減帶圍

韓曾一首

道散斯文體尚浮韓曾力與化工侔山瞻泰華巖巖聳  
河出崑崙混混流長慶從官銷不得熙寧丞相挽難留  
滄州奏疏潮州表猶被人拈作話頭

春旱四首

一春閔雨動龍顏曉殿權停賀雪班林下散人看邸報  
也疎把酒廢游山

去冬玉塞靜無埃春雪雖遲亦壓灾大士送歸天竺去

相公宣入浙江來

屋山無筍圃無蔬  
釜冷尊空客至疎  
說與厨人稀作粥  
老夫留腹要盛書

清明未雨下秧難  
小麥低低似剪殘  
窮巷蕭然惟飲水  
家童忽報井源乾

黃天谷贈詩次韻二首

浪迹徧齊州  
曾從劍俠游  
尚嫌秦政臭  
肯要郅支頭  
客禮朝三殿  
兒嬉弄五侯  
吾猶看不破  
何況道家流

世無仙則已有必屬斯人丹熟將分友雲遊每念親小  
憲時讀易靜室夜修真符篆皆餘事題詩亦出塵

得曾景建書一首

聞君別後買傾城酒戒中年亦放行遠使忽來知病起  
近書全未說丹成莫嫌身去依劉表曾有人甘殺禰衡  
何日斷原荒澗畔一間茅屋對寒檠

示兒

瓜芋村邊一畝宮閉門不復問窮通生羞奏技伶人裏

死怕標名俠客中講學有誰明  
太極吟詩無路和薰風  
身今老矣空追悔但祝吾兒勿似翁

潁陽塘

塘水年時似練湖春來亦已化  
平蕪農官久廢存遺址  
樵子公行作坦途葦折鷺藏身  
不得萍乾魚以沫相濡  
桔槔輶輶聲如泣借問龍公睡  
穩無

春日二首

睡起無人小院空南華一卷磬  
聲中鼻端老去齋香臭

分別柑花是晚風

隙地新鉏一逕通  
野中手自植芳叢  
生來不慣游金谷  
屋角花開也自紅

憶毛易甫薛子舒

昔在江東會集時  
二君獨許話心期  
春風蕭寺同登塔  
落日荒臺共讀碑  
百史染毫供草檄  
萬花圍席看題詩  
那知數尺無情土  
別後雙埋玉樹枝

有感

殘敵如蜂暫寄窠十年南北問干戈  
穹廬昔少曾居汴莫府今猶未過河  
越石不生誰可將奉春再出亦難和  
憂時元是詩人職莫怪吟中感慨多

哭趙紫芝

奪到斯人處詞林亦可悲  
世間空有字天下便無詩  
盡出香分妓惟留硯付兒  
傷心湖上冢誰葬復誰碑

哭周晉仙

君在詩人裏功夫用最深  
古如神禹鑄清似鬼仙吟  
死



定無高塚生惟有破衾長安酒樓上猶記昔相尋

中冓先塋

昔遇重華席屢前因排貴近去翩然叩墀袖有神  
毳疏易簣囊無沐椹錢當日傳家惟諫草至今瞻族賴祠田  
原頭宰木蒼如此纔見山菴葺數椽

被酒

酒戶當年頗著聲可堪病起困飛觥醉呼褚令為傖父  
狂喚桓公作老兵舊有崢嶸皆鏟去新無壘塊可澆平

投牀懶取騷經看只嗅梨花解宿醒

小園卽事二首

何處瑤姬款戶來  
薔薇花下暫徘徊  
分明粉蝶通消息  
未有人知一朵開

因聽蕭聲一念差  
碧雲遮斷阿環家  
春來無遣閒愁處  
玉面紗巾出看花

夢豐宅之二首

一別茫茫隔九京  
夢中慷慨語如生  
老猶奮筆排和議

病尚登陴募救兵天奪偉人關氣數時無好漢共功名  
邊塵未靖王師老寶劍雖埋憤豈平

斯人古少況於今每恨諸賢識未深朝給贖錢方掩骨  
家無餘帛可為衾向來夫子真知己近世門生喜負心  
惟有天涯華髮掾獨揮衰涕望山陰

漢儒二首

執戟浮沉亦未迂無端著頌美新都白頭所得能多少  
枉被人書莽大夫

賣賦長安偶遇知  
後車歸載遠山眉  
可憐犬子真窮相  
不見劉郎過沛時

暮春

燕子來時春事空  
杖藜來往綠陰中  
靜憐朱槿無根蒂  
開落惟銷一陣風

哭吳杞

七十未陞舍目深  
雙鬢殘病中依佛  
寺死處近嚴灘俗  
薄揮金少家貧返  
骨難遺言令火葬  
聞者鼻皆酸

橘花

一種靈根有異芬  
初開尤勝結丹莢  
白于蒼苔林中見  
清似旃檀國裏聞  
淡月珠胎明璀璨  
微風玉屑撼繽紛  
平生荀令薰衣癖  
露坐花間至夜分

薔薇花

浥露含風匝未開  
呼童淨掃架邊苔  
湘紅染就高張起  
蜀錦機成乍剪來  
公子但貪挑夾道  
貴人自愛樂翻塔  
寧知野老茅茨下  
亦有繁英送一盃

荅鄭閨清

多著襦裙少裹巾  
形容蒼槁意清真  
舊時論語都忘記  
難做深衣社裏人

前輩

前輩日以遠斯文  
吁可悲古人皆尚友  
近世例無師  
晚節初寮集中年  
務觀詩雖云南渡  
體俗子未容窺

鐵塔院

鐵塔荒涼院年深  
失主名昔遊基已廢  
今至屋皆成人

出私錢施僧憑願力營如何榆塞上却有未包城

東方寺丞病足

西北名山未徧經詎宜倚杖至玲竈脉通氣數醫難曉  
病在皮膚藥易靈昔走戰場常縱靶今居內室更施屏  
平生受用嵇康論欲獻公為座右銘

後村集卷三